

## **Deklaratioun zur Aussepolitik vum 29. November 2005**

**présentéiert vum Aussen- and Immigrationsminister Jean Asselborn**

---

Här Präsident,

Dir Dammen an Dir Hären,

Et ass dëst di éischte Kéier dass ech d'Éier an d'Geleeënheet hunn, virun der Chamber d'Deklaratioun zur lëtzebuenger Aussepolitik ze maachen; fir lech d'Prinzipien, d'Objektiver an d'Erausforderungen vun eiser Aussepolitik duer ze stellen.

Dës Deklaratioun kënnt zu engem ongewinnte Moment. Déi vill Engagementer vun der lëtzebuenger Présidence vun der Europäescher Unioun hu mir et net erlaabt, esou wéi et Traditioun ass, am Fréijoer virun lech ze trieden: Dir hutt dofir vill Verstännniss gewissen an ech well lech hei nach eng Kéier ausdrécklech Merci soen.

Et wäert lech sécher net erstaunen dass d'Présidence och eng besonnesch Plaz an dëser Deklaratioun wäert anhuelen. Dobäi geet et mir net esou dorem fir d'Haaptévénementer an d'Haapt dossiers nach eng Kéier en revue passéieren ze loossen, mä méi dorem an d'Zukunft ze kucken, ze kucken wou mir stinn no där Présidence, mir Lëtzebuerg, mir Europa, mä och mir Lëtzebuerg an dësem Europa an an der Welt.

Fir Lëtzebuerg war dëst, eis eeleft Présidence, eemol méi d'Geleeënheet ze weisen datt mir bereet sinn, eisen Deel vun der globaler Responsabilitéit ze iwwerhuelen, datt mir an Europa, an iwwer Europa eraus, en aktive Bäitrag brénge kënnen, datt mir e kredible Partner sinn, en engagéierte Partner deen sech fir d'Unioun an d'Interessi vun der Unioun asetzt, dee probéiert de grouse Projet Europa weider ze bréngen.

Dësen Engagement fir d'Weiderverdéiwung vun der europäescher Integratioun a fir d'Erweiterung vun der EU no präzise Krittären, entsprécht eiser Konviktioon, mä och eisem Interessi. En eenegt a staarkt Europa ass am Interessi vu Lëtzebuerg a vun de Bierger hei am Land. D'Interessi vu Lëtzebuerg a vun der EU sinn deckungsgläich.

Eist politescht Gewiicht, eisen Afloss op d'Affaire vun dëser Welt, an ëmgedrëit eis Ofhängegkeet vum Weltgeschéien, waren nach ni esou ausgeprägt wéi dat haut de Fall ass. Eise Wuelstand, eis Sécherheet a Stabilitéit, si baséieren op gemeinsamen Äentwerten zu den Erausforderunge vun der globaliséierter Welt, op internationaler Kooperatioun an Institutiounen wéi der EU, der NATO an der UNO.

« Efficace Multilateralismus » ass fir eis méi wéi nëmmen e Schlaagwuert. D'Présidence gouf eis d'Geleeënheet dat eemol méi ënner Beweis ze stellen.

D'Europäesch Unioun huet sech an hirer Sécherheitsstrategie kloer fir eng multilateral Approche ausgeschwaat, mat de Vereenten Natiounen am Zentrum. D'Weltorganisatioun muss déi essentiell Roll am Erhale vu Fridden a Sécherheet, an der Promotioun vun de Mënscherechter, am Kampf géint d'Aarmutt an d'Ënnerentwécklung spillen.

An deem Sënn hu mir intensiv un der Virbereedung vum UNO-Sommet am September matgeschafft. Et war eis wichteg eisen Deel dozou bäizedroen, datt d'Organisatioun vun der Weltgemeinschaft déi nei Erausforderungen, déi sech eis am 21ten Jorhonnert stellen, besser ophuele kann an datt mer och dem Erfëlle vun de "Millennium Development Goals" méi no kommen.

Besonnenesch an dësem leschten Domän kann ech soen datt d'Unioun hirer Responsabilitéit gerecht ginn ass. Esou hunn sech déi 25 Memberstaaten am Mee vun dësem Joer derzou engagéiert, bis 2010 kollektiv 0,56 % vun hirem Interne Bruttosozialprodukt fir d'Entwécklungshëllef zur Verfügung ze stellen a bis 2015 den Objektiv vun 0,7 % ze errechen.

Eisen Engagement fir e Multilateralismus dee funktionnéiert, spigelt sech awer och an anere Beräicher erëm wéi dem Asaz a Krisesituatiounen, ob a Kooperatioun mat eise Partner aus der NATO oder eegestänneg, am Kader vun enger ziviler oder militärescher Missioun am Kontext vun der Europäescher Sécherheits- a Verdeedegungspolitik. Esou sinn am Moment net wéiniger wéi 10 EU Missiounen deployéiert, dräi dovun am Balkan, dräi an Afrika, dräi am Mëttleren Osten an eng an Asien.

D'Weiderentwécklung vun eiser Gemeinsamer Aussen- a Sécherheitspolitik ass, schlussendlech, baséiert op der Recherche vu multilaterale Solutiounen an der Bereitschaft, Verantwortung ze iwwerhuelen an d'Roll vum "acteur payeur" ze dépasséieren.

Et ass an deem Geescht wou mir déi aussepolitisch Erausforderungen ënnert eiser Présidence ugaange sinn.

Dir Dammen an Dir Hären,

D'Relatiounen tëschent Amerika an der Europaescher Unioun waren ouni Zweifel duerch d'Irakkrisis belaascht: d'lëtzebuurger Présidence haat sech dofir als ee vun hiren Zieler gesaat, dës Relatiounen, déi esou vital fir eis all sinn, engersäits ze relancéieren an anerersäits d'Unioun nees zesammenzebréngen. Ech mengen ech ka soen, datt mir dat Zil ereecht hunn.

Déi zwee Sommeten, mat enger éischter Visite iwerhaupt vun engem amerikanesche Präsident bei den europäeschen Institutiounen am Februar vun dësem Joer, déi vill Rencontren op allen Niveauen an an alle Formater, sief et zu 25, an der Troïka oder bilateral, hunn et erlaabt, den transatlanteschen Dialog nees op méi eng partnerschaftlech Basis ze setzen an eis Politiken erëm verstärkt openeen oofzestëmmen, an dat esouwuel am politeschen, wéi am ekonomeschen oder am Umwelt-Beräich.

Den israelesch-palestinenseschen Konflikt, den Iran, den Irak, d'Situatioun am Mëttleren Osten am allgemengen, mä och d'Developpementer an Asien, de Balkan an de gemeinsame Kampf géint den Terrorismus, fir nëmmen e puer Beispiller ze nennen, goufe regelméisseg diskutéiert. D'Wichtigkeet vun engem Echange, vun enger gemeinsamer Approche déi op dem Dialog an der Negociatioun baséiert, stoung dobäi am Virdergrond.

D'Häerzstéck vum EU-USA Sommet am Juni zu Washington war eng ekonomesch Deklaratioun, déi d'Basis liwwert fir an den transatlantesche Wirtschaftsrelatiounen déi Barrièren ofzebauen, déi nach bestinn, besonnenesch am reglementaire Beräich. No breede Konsultatiounen vum private Sektor op béide Säiten vum Atlantik konnt en Accord fonnt ginn, deen net just déi Beräicher oplëscht a verdéift, an denen d'USA offensiv Interessien hunn, mä och déi Beräicher, déi der EU ganz wichteg sinn, wéi z.Bsp. d'Reglementatioun vun de Marchés Publics. Deen Accord gétt elo op de Wee vun der Ëmsetzung bruecht.

Um Sommet am Juni ass och - no Joeren nees eng Kéier - iwwer d'Ëmweltproblematik geschwat ginn: während laanger Zäit ware Schlagwierder wéi Klimawandel oder Kyoto-Protokol rout Dicher fir d'Amerikaner. D'EU huet hei eng aktiv Iwwerzeegungsroll ze spillen.

D'Situatioun am Mëttleren Osten stung awer net nëmme mat der USA ganz uewen um Ordre du jour. D'Europäesch Unioun engagéiert sech zënter ville Joeren fir eng gerecht an dauerhaft Solutioun am israelesch-palestinenseschen Konflikt. Als Member vum Quartet hu mir eis fir eng Relance vum Friddensprozess am Aklank mat der "Feuille de route", fir e Stopp vum Bau vun israeleschen Siedlungen an den Okkupéierten Territoiren, fir e Stopp vum Mauerbau, fir en Enn vun den israeleschen Aktivitäten an a rondërem Ost-Jerusalem, mä awer och fir d'Recht vun Israel a Sécherheet an am Fridde mat sengen Noperen ze liewen, agesat.

D'Evenementer dës lescht Deeg loossen hoffen datt nees Mouvement an de Friddensprozess kënt. D'Opmaachen vum Grenzposten zwëschen der Gazasträif an Aegypten ass méi ewéi nëmmen e symbolesche Schrëtt a Richtung vun engem souveräne Palestinensesche Staat: si erméiglecht och

eng dréngend néideg ekonomesch Perspektiv. Ech sinn houfreg dorop datt mir, mat Äerer Ënnerstëtzung, eis aktiv un der EU-Grenzkontrollmissioun zu Rafah kënnen bedeelegen an esou eisen Engagement fir dës schwiereg Region ënner Beweis stellen.

D'Wahlen fir de Palestinensesche Conseil législatif am Januar 2006 repräsentéieren en anere wichtege Schrëtt. Et ass kruzial datt déi Wahlen fräi a fair oflafen an datt Israël op d'besch mat der Palestinensescher Autoritéit an der Preparatioun vun de Wahlen kooperéiert. Och héi wäerte mir, wann Dir d'Accord sidd, präsent sinn am Kader vun der EU Wahlobservatiounsmissioun.

Zu de Wahlen déi fir Mäerz an Israël ugesat sinn ee Wuert: si bréngen Hoffnung fir eng nei parlamentaresch Konstellatioun an dësem Land, déi zu engem Retour zur "Feuille de route" an engem dauerhafte Fridden ka féieren. Loosse mir hoffen datt dës Chance net ongenotzt bleiwt.

An deem Kontext ass och eisen Engagement am Barcelonaprozess ze gesinn, bis haut deen eenzege regionale Forum wou Israel mat de Palästinenser an den arabesche Länner ronderëm een Dësch sëtzt. Enn Mee huet hei zu Lëtzebuerg déi 7ten « Conférence ministérielle euroméditerranéenne » stattfonnt wou mir, di éischte Kéier zënter dem Lancement vum Barcelonaprozess virun 10 Joer Konklussiounen déi vun allen Parteien gedroen goufen, iwwer déi 3 Voleten - dee politesch a sekuritären, dee wirtschaftlechen an dee kulturellen - vun dëser Kooperatioun adoptéieren konnten. Dat war besonnesch wichteg en Vue vum Sommet deen de Weekend zu Barcelona stattfonnt huet a wou mir gemeinsam mat eise Partner aus dem Mëttelmierraum eis Prioritéite fir déi nächst Joeren gesaat hunn. Esou wäerte mir an Zukunft d'Zesummenaarbecht verstärken wat d'Ëmsetzung vu politeschen a wirtschaftleche Reformen, d'Kooperatioun am Domän vun der Immigratioun, an d'Programmer am Edukatiounssektor ugeet. Den Dialog tëschent de Kulturen ass en anert wichtegt Element vun eisem Partenariat, en ëmmer méi wichtegt. D'Fondatioun Anna Lindh, déi am Abrëll dëst Joer lancéiert gouf, grad ewéi d'Initiativ vun enger Allianz vun den Zivilisatiounen, déi vum spueneschen an tierkesche Premier Minister proposéiert gouf, schwätzt dofir.

Den Accord deen Däitschland, Frankräich an England, déi sougenannten EU3, am November 2004 mam Iran iwwer nuklear Froen oofgeschloss hunn, huet et um Niveau vun der EU erlaabt, Diskussiounen iwwer en Accord de Commerce et de Coopération, an en Accord politique, déi zënter 2003 ënnerbrach waren, nees opzehuelen. Dräi Negociatiounsronnen hunn doropshin ënnert eiser Présidence stattfonnt. D'Troïka huet ausserdeem Gespréicher geféiert fir den Dialog mam Iran iwwer d'Mënscherechter erëm opzegräifen. D'Europäesch Unioun koppelt d'Entwécklung vun hire Relatiounen mam Iran, wéi dir wësst, net nëmmen u positiv Geste vun Teheran am nukleare Beräich, mä och un de Respekt vun de Mënscherechter, de Kampf géint den Terrorismus an un dem Iran seng Positioun am Friddensprozess am Nohen Osten. Dat war äis besonnesch wichteg während eiser Présidence a muss, eiser Meenung no, och an Zukunft d'Basis vun der EU hirer Politik vis-à-vis vum Iran bleiwen.

D'lescht Woch huet de Conseil vun de Gouverneure vun der Internationaler Atomenergieagence (AIEA) den Iran opgefuerdert, d'Diskussiounen mat den EU3 nees opzehuelen, méi Transparenz un den Dag ze leeën wat sein Nuklearprogramm betrëfft an den additionnelle Protokoll zum TNP-Vertrag esou séier ewéi méiglech ze ratifizéieren. D'Méiglechkeet vun enger Saisie vum Sécherheetsrot vun de Vereenten Natiounen bleiwt och weiderhin bestoen. Ech hoffen, datt d'Iranesch Autoritéite sech dem Eescht vun der Situatioun bewosst sinn an d'Verhandlungen op der Basis vum Accord de Paris nees opgräifen. Et schéngt ewéi wann éischt Sondéierungsgespréicher an deem Sënn sollte stattfannen, wat ech nëmme begrëisse kéint. D'Zil ass et um diplomatesche Wee alles ze maachen datt den Iran iwwer keng nuklear Waffen verfügt. Dat ass den Interessi vun der EU, esou wéi vun der internationaler Weltgemeinschaft.

Mir wëssen nach allze gutt, wéi diviséiert Europa iwwer de Krich am Irak war. Vill vun eis wollten dee Krich net, mä mir sinn haut matgefuerdert, eis mat senge Konsequenzen ausernee ze setzen a mat ze hëllefen, datt aus dem Irak e friddlecht, demokratescht, souveränt, prospéret Land gétt, e Land an deem d'Mënscherechter respektéiert ginn an dat eng positiv, stabiliséierend Roll an dëser esou wichtege Region vun der Welt spillt. Dat ass en Objektiv dee mir all an der Unioun deelen, an un deem senger Ëmsetzung mir ënnert lëtzebuergeschem Virsëtz aktiv geschafft hunn.

Esou sinn zënter Krichsenn eng 518 Milliounen € vun der Kommissioun zur Verfügung gestallt ginn fir d'Rekonstruktioun vum Land, fir den Neesopbau vu Basisservicer an Infrastrukturen, mä och fir d'Organisatioun vun de Walen an den Opbau vun engem Rechtsstaat. Den 1te Juli dëst Joer huet dann och d'EU-Zivilmissioun EUJUST LEX, déi ënnert lëtzebuurger Présidence décidéiert a preparéiert gouf, mat Formatioun ausserhalb vum Irak am Beräich vun der Police, de Geriichter an

dem Prisongswiesen ugefaang, an am September hu mir mat der irakescher Interimsregierung en Ofkommes iwver d'Verdeiwung vun eise Relatiounen an de politeschen Dialog ënnerschriwwen.

Ech war, wéi der wësst, selwer mat menge Kollege vun der Troïka zu Bagdad fir op der Plaz net nëmmen ze weisen datt Europa dem Irak an dem irakesche Vollek bäisteet an deem schwierigen Transitionsprozess an deem et sech befënnt, mä och fir eis Erwaardungen an deem Prozess virzebringen. Datt mir en Irak wëllen an deem all d'Parteie matschaffe kënnen, an deem d'Rechter vun alle respektéiert ginn, egal ob Mann oder Fra, Sunnit, Shiit oder Kurd. Dat war och de Grond firwat mir eis bereet erklärt hunn, zesumme mat den USA, an an enker Zesummenaarbecht mat de Vereenten Natiounen, eng international Konferenz iwwert den Irak ze organiséieren. D'irakesch Interimsregierung sollt d'Geleeënheet kréien, der internationaler Communautéit hire Programm, hir Visioun fir d'Zukunft virzestellen. De Communiqué deem um Enn vun der Konferenz vun deene méi wéi 80 Länner an Organisatiounen, déi präsent waren, ugeholl gouf, spigelt dann och e breede Konsens iwwert déi nächst Schrëtt, déi am Kader an am Aklank mat der Resoloutioun 1546 vum Sécherheitsrot ze ënnerhuele sinn.

D'legislativ Wahlen, déi de 15ten Dezember stattfannen, repräsentéieren eng wichteg Etapp an deem Prozess. Et ass essentiell datt all Gruppen un dese Wahlen deelhuefen an datt eng repräsentativ Regierung gebilt gëtt, eng Regierung, déi vun allen Iraker gedroe ka ginn. Et muss zu enger nationaler Reconciliatioun kommen. Ech kann dofir d'Initiativ vun der Arabescher Liga fir eng Reconciliatiounskonferenz ugangs vum nächste Joer zu Bagdad nëmme begréissen. De grausamen Terror am Irak muss en Enn fannen. D'Iraker mussen esou bal ewéi méiglech nees d'Sécherheet am Land selwer kënnen assuméieren.

An all deenen Dossieren, déi ech bis ewell ugeschwat hunn, huet natierlech och d'Kooperatioun mat Russland eng wichteg Roll gespilt. A regelméissege Rencontres hu mir eis Vueën iwver déi grouss Krisenherder op der Welt ausgetosch. D'gemeinsam Noperschaft stung dobäi besonnesch am Virdergrond. Innepolitesch war dat éischt Hallefjoer geprägt duerch d'Finalisatioun vun de 4 gemeinsamen Espacen, déi d'Basis fir eis Kooperatioun an deene nächste Joeren bilde sollen.

Mir konnten déi Verhandlungen beim EU-Russland Sommet den 10 Mee zu Moskau erfollegräich ofschléissen an eis domat gemeinsam Objektiv an deene 4 Beräicher – Wirtschaft; Fräiheet, Sécherheet a Justiz; Aussesécherheet, sou wéi Recherche, Edukatioun a Kultur - ginn. D'Diskussioun vun de Mënscherechter huet dobäi och eng wichteg Roll gespilt, den 1. März 2005 sinn iwverens hei zu Lëtzebuerg déi éischte Kéier institutionaliséiert Gesprecher um Niveau vun der EU mat Russland iwver d'Situatioun vun de Mënscherechter gefouert ginn. Dat ass méi wéi nëmmen e symbolesche Schrëtt.

Et war eis och wichteg, esou séier wéi méiglech op déi nei Evolutiounen bei engem anere vun eisen Noperen ze reagéieren: der Ukraine. Esou hu mir den 21. Februar den éischten Aktiounsplang, baséierend op der Europäescher Politik fir d'Nopeschlänner mat der Ukraine ënnerschriwen, an hu Moosname fir eng Weiderverdeiwung vun eise politeschen an ekonomeschen Relatiounen parallel zum Demokratisatiounsprozess, deem an der Ukraine vum Präsident Yushenko ageleet ginn ass, ugeholl. Um Sommet, deem Enn dëser Woch zu Kiev stattfënnt, wäerte besonnesch Verhandlungen fir en Ofkommes iwver Visafacilitatiounen, déi kierzlech lancéiert goufen, esou wéi weider ekonomesch Reformen, am Zentrum vun den Diskussiounen stoen. An deenen nächste Méint dierft der Ukraine och de Statut vun enger "économie de marché" zouerkannt ginn.

Et ass sech während der Présidence awer net nëmmen op d'Nopeschlänner vun der EU konzentréiert ginn: d'Kontakter mat Asien, Latäinamerika an Afrika stungen och op der Dagesuerdnung. Esou hate mir ënnert anerem Réuniounen op Ministeschniveau mat den ASEAN-Länner an der ASEM, eng éischt Troïka ministérielle zu Peking wou mir 30 Joer diplomatesch Relatiounen tëschent der EU a China feiere konnten an dann natierlech och de Sommet mat Japan, den 2. Mee hei zu Lëtzebuerg.

Wat China ugeet, huet an der Ëffentlechkeet, een Thema ganz kloer dominéiert : de Waffenembargo. Wéi der wësst hat d'lëtzebuerger Présidence am Dezember 2004 e Mandat vum Europäesche Rot kritt fir d'Aarbechten en vue vun enger Levée vum Waffenembargo weiderzedriewen. Esou en Ophiewe vum Embargo sollt awer an engem gewësse Kontext geschéien : esou sollt den europäesche Code de conduite fir Waffenexporter renforcéiert ginn an d'EU sech Instrumenter ginn fir Länner déi sech an enger Transitionsphase nom Ophiewe vun engem Embargo befannen : déi sougenannten « Toolbox ». Der Situatioun vun de Mënscherechter a besonnesch de chineseschen Autoritäten hir Fortschrëtt an der Ratifikatioun vun der Internationaler Konventioun iwwert Zivil a Politesch Rechter sollt ausserdeem Rechnung gedroe ginn. Den institutionellen Mënscherechtersdialog tëschent der EU a China ass dann och ënnert eiser Présidence virugefouert ginn. D'Aarbechten

iwwert de Code de conduite an d'Toolbox konnten *en revanche* net ofgeschloss ginn, esou datt et zu kenger Decisioun iwwert de Waffenembargo koom.

Et war eis als Présidence awer och wichteg eng Diskussioun iwwert den Embargo eraus mat China an iwwer China ze féieren. Wéi schons gesot ënnerhält d'EU ëwell zënter 30 Joer diplomatesch Relatiounen mat China. D'Volleksrepublik ass ouni Zweifel déi kommend Muecht an et ass wichteg datt mir den Dialog mat Peking ënnerhalen an dat esouwuel um europäeschen wéi um nationale Plang. Eng Staatsvisite a China ass dofir och fir déi nächst Zukunft geplangt.

D'Haaptmanifestatiounen mat Latäinamerika hunn hei zu Lëtzebuerg stattfonnt: ech wëll do vun de ministérielle Réuniounen mat dem Rio-Grupp an de regionalen Oganisatiounen wéi dem Mercosur an dem Pacte andin schwetzen. Verdéiung vum politeschen Dialog, mä och vun eise wirtschaftleche Bezéiunge mat dëser Regioun vun der Welt, déi sech an engem Integrationsprozess befënnt, stungen dobäi am Mëttelpunkt.

Laang hu mir eis Relatiounen mat Afrika haauptsächlech ënnert dem Gesiichtspunkt vun der Entwécklungshëllef gesinn. Haut versicht d'Unioun verstärkt mat den afrikanesche Strukturen wéi der Union africaine, der CEDEAO oder der SADC zesammenzeschaffen, si ze ënnerstëtzen am Opbau vun eegene Kapazitéite fir Krisen ze geréieren an e wierklecht Partenariat ze entwéckelen. Echangen iwwer Regiounen wéi d'Elfenbeinküst, den Togo, de Sudan oder d'Grands Lacs stungen dofir déi lescht Méint grad esou um Ordre du jour ewéi d'Preparatiounen vum UNO Sommet am September an d'Erfëlle vun de "Millennium Development Goals".

Här Präsident,

Loosse mer nach ee Moment zeréckkommen op Regiounen déi eis geographesch méi no stinn.

Enner lëtzebuerger Présidence sinn eng Partie wichteg Decisiounen geholl a virbereet ginn, déi d'Balkan-Länner méi no un Europa wäerte bréngen.

Wéi Dir wësst huet d'EU dëse Länner um Sommet zu Thessaloniki 2003 eng europäesch Perspektiv ginn. Um Wee fir an d'Unioun ginn hinnen Ofkommenes proposéiert, déi si op eng spéider Adhesioun solle préparéieren. Stabilisatiouns- an Associatiounsaccorden mat der fréierer jugoslawescher Republik Mazedonien a mat Kroatien bestinn schon, mat Albanien sinn d'Verhandlungen esou gutt ewéi ofgeschloss, während d'Negociatiounen fir esou en Ofkommenes mat Serbie-Montenegro a mat Bosnien-Herzegovina grad ugefaang hunn. Déi Decisiounen sinn ënnert eiser Présidence virbereet oder virugedriwwen ginn, well mir dovun iwwerzeegt sinn, dass Europa et muss éierlech mengen mat senger Versproche vun Thessaloniki.

D'Europäesch Unioun sollt d'Perspektiv vun enger Adhesioun och als Hiewel benotzen, fir de Länner um Balkan an a Süd-Ost-Europa ze hëllef, déi néideg Reformen duerchzuféieren, déi hinne Stabilitéit, Friden a Wuelstand garantéieren.

Mir hunn am Balkan natierlech och d'Entwécklungen am Kosovo genee verfollegt, an dru geschafft, der EU hir Roll an deem Prozess ze definéieren, deen elo ugefaangen huet an zu engem definitive Statut fir de Kosovo soll féieren. Um Conseil européen vum Juni hu mir Prinzipien fixéiert fir de Statut vum Kosovo, an dee Kader gesat, deen der Unioun et erlaabt, am Kosovo-Prozess enk matzeschaffen a mat ze decidéieren. Esou ass et fir eis kloer datt et kee Retour op d'Situatioun virun Mäerz 1999 kann ginn. D'Decisioun iwwert de Statut vum Kosovo muss baséieren op der Multi-Ethnicitéit, um volle Respekt vun de Mënscherechter, a virun allem dem Recht vun alle Flüchtlingen, a Sécherheet nees kënnen heem ze goen. De Statut muss déi néideg konstitutionnell Garantie bidden fir de Schutz vun de Minoritéiten, a Mechanisme virgesin fir dass Vertrieeder vun de Minoritéiten an der Regierung wéi och an de lokale Verwaltungsstrukture matschaffe ze kënnen. D'Decisioun iwwert de Statut kann net unilateral sin, an dierf net imposéiert gin. Fir d'Europäesch Unioun as all Verännerung vum Territoire vum Kosovo inacceptabel : de Kosovo kann also net gedeelt gin, an och net mat engem Nopeschland vereenegt gin.

Och am Erweiterungsprozess vun der Europäescher Unioun huet eis Présidence wichteg Etappen ageleet.

De 25ten Abrëll hu mir zu Lëtzebuerg de Bättrëtsvertrag mat Rumänien a Bulgarien ënnerschriwwen. Dës Bättrëtsverträge mussen elo vun alle Memberstaate vun der Europäescher Unioun ratifizéiert ginn. D'lëtzebuerger Regierung huet dofir viru kuerzem e Projet de loi hei an der Chamber deposéiert, a mir hoffen duerch eng schnell Ratifikatioun dëse Länner e positivt Signal kënnen ze ginn.

Mat dem geplangte Bättrëtt vu Bulgarien a Rumänien den 1. Januar 2007 ass déi 5. Bättrëttswell komplett, déi am Dezember '97 um Europäesche Rot zu Lëtzebuerg ugefaangen huet. Domat ass, no bal 60 Joër Separatioun, Europa endlech erëm zesummegeuess. All déi Länner, och déi, déi 2004 bätgetruede sinn, hunn enorm Ustrengunge gemaach, déi net einfach ware just nodeems se hir Fräiheet a Souveränitéit zeréckgewonnen haten. Dat alles dierfe mir net vergiessen, och wann dat fir eis esou selbstverständlech erschéngt. Déi rezent Rapporten vun der Europäescher Kommissioun weisen, datt Rumänien a Bulgarien nach e puer lescht Hürden ze iwwerspringen hunn eier se kënnen bättrieden, mä ech sinn iwwerzeegt, datt déi Länner des Etapp och nach wäerte packen.

D'Erfëlle vun de politeschen an ekonomesche Kritären vu Kopenhagen ass och fir déi nächst Erweiterungskandidaten d'Basis fir d'Adhesioun. D'voll Kooperatioun mam Internationale Gerichtshaff fir ex-Jugoslawien ass doriwwer eraus en essentielle Kritär fir de Bättrëttsprozess vu Kroatien an alle Balkan-Länner. Dowéinst konnten d'Verhandlungen mat Kroatien och net wéi geplangt de 17te Mäerz, mä eréischt den 3ten Oktober ugefaang ginn. Esoubal wéi d'Kroaten déi néideg Efforten gemaach hunn, hunn ech mech dofir agesat datt Verhandlungen esou séier ewéi méiglech ugefaang hunn.

Den 3. Oktober hu mir als EU awer och ugefaange mat der Türkei ze verhandelen. Mir hunn dat am volle Respekt vum Engagement gemaach dat mir um Conseil européen am Dezember 2004 geholl haten.

Munch Bierger zu Lëtzebuerg wéi an der Unioun maache sech Suergen, wat d'Türkei ugeet. Dat muss ee respektéieren an eescht huelen. Dat weist awer och, datt mir als Regierungen de Leit eis Aarbecht musse besser vermëttelen. D'Türkei kann eréischt bättrieden, wann si, wéi all déi aner Bättrëttskandidaten, um politeschen an ekonomesche Plang prett ass, a wann d'Unioun och gläichzäiteg prett ass fir nei Memberen opzehuelen. D'Verhandlungen, déi mir elo ugefangen hunn, wäerte laang, ganz laang, esou laang wéi néideg daueren.

De wichtege Punkt ass, an dofir hun ech mech och agesat datt den Datum vum 3ten Oktober giff respektéiert ginn, datt Problemer ewell rondërem e Verhandlungsdësch diskutéiert ginn, datt e Kader geschaf ginn ass, datt e Prozess lancéiert ginn ass.

Um Enn vun deem Prozess wäert d'Türkei net méi déi selwecht Türkei sinn, déi mir elo kennen.

D'Türkei huet nach e laange Wee virun sech a mir mussen si dobäi ënnerstëtzen a begleden, net zulescht well et och an eisem Interessi ass, datt d'Türkei eng europäesch Türkei ass.

Här Präsident,

Niewent den aussepolitischen Themen an Aarbechtsberäicher vun eiser Présidence, an deenen mir direkt betraff an aktiv waren, wëll ech des Geleeënheet awer och benotzen fir méi breet ze erklären, wéi d'lëtzebuurger Présidence an alle Beräicher probéiert huet, d'europäesch Integratioun weider ze bréngen.

Esou konnte mer an deem éischte Semester substantiell weider schaffen fir gemeinsam europäesch Äentwerten ze sichen zu wirtschaftlechen a sozialen Erausforderunge vun der globaliséierter Welt.

Den Europäesche Rot am Fréijoer huet eis genee déi Méiglechkeet ginn doduerch dass d'Lissaboner Strategie vum Joer 2000 huet missen erneiert an den neien Emstänn ugepasst ginn fir besser Richtung Wuesstum an Aarbecht ze goen. Mir hu kloer gesot, dass et héich Zäit gëtt ze handelen, net handelen ass keng Optioun. Richteg handelen, um europäeschen an um nationale Plang, dat ass eise Choix. Dat hunn déi 25 och décidéiert.

Eis Suerg waren de richtege Equiliber tëschent deenen dräi Komponente vun der Strategie ze halen, dat heescht Wirtschaft, Soziales an Ëmwelt. Méi Kompetitivitéit muss Hand an Hand goe mat sozialem Fortschrëtt, an Ëmwelt ass do en onentbierlecht Element dat komplementär ass fir eng durabel Entwécklung fir eis Gesellschaften.

D'Relance vun der Lissaboner Strategie ënnert eiser Présidence soll eis hëllef, eis national an europäesch Instrumenter a Mëttelen besser a méi komplementär anzesetzen. Dat soll de Fall sinn : 1. am Beräich Wëssen an Innovatioun duerch méi gezielten Aktiounen a Recherche a Wëssenschaft, och fir de Mëttel- a Kleng Betriber ze hëllef ze innovéieren; 2. fir Europa attraktiv ze maache fir Investissementer; 3. dofir ze suergen dass Wuesstum an Aarbecht am Sënn vu sozialer Kohäsioun musse funktionnéieren. Mir hunn och ënnerstrach watfir eng nei industriell Méiglechkeeten et och an der Ëmwelt ginn. Dat ass de Programm, deen Europa sech am Mäerz fir déi nächst Jore ginn huet.

D'Essenz vun dësem Programm ass kloer ze ëmräissen. Wat mir an der EU brauchen ass en Europa :

- wat Äntwerten op d'Erausforderungen vun der Globaliséierung get,
- wou d'Kompetitivitéit net op d'Käschte geet vun de Sozialsystemer, wéi se a ville vun den EU-Länner am leschte Jorhonnert erkämpft gi sinn,
- wou Sozialdumping a Fiskaldumping fir eng falsch Flexibilitéit um Aarbechtsmaart an an der Wirtschaftspolitik stinn.

Jiddfer Land muss säi Rythmus fannen a seng Prioritéiten, mä am grouse Kader vun deem wat mir zesummen decidéiert hunn, dat heescht op Basis vun de 24 "Lignes directrices intégrées" déi den Europäesche Rot am Juni festgehalen huet fir d'Period 2005-2008. An et muss an all Land e richtegen Dialog mam Parlament a mat de Sozialpartner stattfannen iwwert den nationale Reformprogramm deen der Kommissioun fir dësen Hierscht muss virleien.

Dës Chamber huet virun zwou Wochen och eisen nationale Reformprogramm virgeluecht kritt, nodeem dass d'Regierung an der Tripartite dës Themen ugeschwat hat. D'Europäesch Kommissioun wäert elo am Januar hir Meenung zu de Programmer ginn, a feststellen ob si global an déi richteg Richtung ginn.

Och wann no eiser Présidence vill geschwat ginn ass iwwert déi nei Emstänn vun der globaliséierter Welt, a wéi Europa sech besser soll virbereeden, esou géif ech just gäre feststellen, dass mir genee dat am éischte Semester schons gemaach hunn, mä dass et eréischt richteg gesi gëtt wa jiddfer säi Programm zesummestellt. Mir hunn inhaltlech de Kader gesat fir déi nationale Reformprogrammer an hunn eng Method festgeschriwwen, wéi déi Programmer solle gemeinsam mat der Kommissioun ausgewäert ginn. Den informelle Sommet Enn Oktober zu Hampton Court huet eis bestätegt, dass dësen Choix richteg war a bleiwt.

No opregenden Zäiten huet d'lëtzebuurger Présidence och konnten d'Reform vum Stabilitéitspakt am Mäerz ofschléissen. Elo gëllt et, déi Regele vun enger verbesserter Ëmsetzung vum Stabilitéitspakt un all Memberstaate, grouss a kleng, unzewenden. D'Eurozon an hir Stabilitéit fir Europa an eis Währung sinn eng formidabel performant Äntwert an enger globaliséierter Welt. Dat därefer mir ni vergiessen.

Deen drëtten groussen Dossier vun eiser Présidence, d'Finanzperspektiven 2007-2013 konnte mir am Juni leider net ofschléissen. Mir haten am Dezember 2004 d'kloert Mandat kritt fir de Finanzpaket zu engem politeschen Akkord ze bréngen an hunn och mat allen Kräften dat Objektiv ugepeilt. Op allen Niveauen hu mer d'Verhandlung weiderbruecht.

Mir konnten no an no e Gesamtpaket, déi sougenannten "Negotiating box" vun Ausgaben an Eegemittel zesummestellen, déi dem Europäesche Rot am Juni virlouch.

Mä d'Emstänn no den negative Referenden an och de Fait dass d'Memberstaate leider eréischt ënnert dem extremen Zäitdruck vun der allerleschter Minutt decidéieren, hu gemaach, dass 5 Länner eisem Kompromëss net wollten zoustëmmen. 20 Länner waren also bereet, dee Kompromëss ze droen, och wann et fir Verschidderer guer net einfach war. Et ass sécher, dass de sougenannten "englesche Chèque" den Haaptproblem war an bis elo och nach ass.

Ech sinn iwwerzeegt dass d'englesch Präsidenschaft weess waat um Spill steet.

D'EU ass méi wéi eng ekonomesch Interessegemeinschaft. D'EU ass e Friddensprojet deen op der Solidaritéit vun all sengen Memberstaaten fousst. Solidaritéit heescht Kohäsion, heescht datt déi méi räich deene manner räichen hëllef, et heescht deene Länner Fongen zouzestoen déi se am néidegste brauche fir hir Infrastrukturen auszebauen an sech esou wirtschaftlech a sozial ze stabiliséieren. Esou wéi et an der EU vun de 15 mat Griichenland, Portugal a Spuenie méiglech war.

Dofir brauch d'EU eng Léisung. Net a 6 Méint oder an engem Joer, mä elo. Fir datt déi Programmer déi decidéiert sinn och eng Chance kréien konkretiséiert kënnen ze ginn.

De Budget dat ass och d'Finanzéierung vu Lissabon, also der Kompétitivitéit, der Recherche an der Innovatioun. An et ass d'Enveloppe déi d'EU brauch fir op der Weltbühn an enger multipolarer Konstellatioun niewent den USA, Russland, China an Indien präsent ze sinn.

Schlussendlech ass den EU-Budget och d'PAC (Politique Agricole Commune), an do kann een d'Ofkommen vun 2002 net einfach ignoréieren.

Eng Iddi, déi mir schons am Juni virbruecht haten, an déi no dem Hampton Court Sommet Enn Oktober méi konkret gin ass, ass eng Revisiounsklausel am Finanzpaquet virzegesinn. Dat géif heeschen datt 2009/10 mir an der Unioun eng substantiell Diskussioun iwwert d'Struktur vum ganzen Budget géifen ufänken, esouwuel iwwert d'Ausgaben ewéi iwwert d'Ressourcen, an natierlech och iwwert d'PAC an d'Method wéi an der Zukunft de Budget soll finanzéiert ginn. Dës Revisioun ass sécher nëtzlech an néideg. D'Klausel soll en Element sinn fir ze hëllef am Dezember en Accord ze fannen. D'Resultater vun där Revisioun sollen dann vun 2014 un ugewandt ginn.

Op dësen Dag kann ee folgendes kloer festhalen :

- 25 Länner wëllen am Dezember eng Léisung béi den Finanzperspektiven;
- 20 Länner op d'mannst soen datt eng Léisung nëmmen op Basis vun eise Propose vum Juni ze fannen ass, dorënner Frankräich an Däitschland,
- de 7ten Dezember brauche mir am Konklave vun den Ausseministeren präzis Zuelen um Dësch,
- de 15ten a 16ten Dezember um Europäesche Rot brauche mir de gemeinsame Wëllen fir datt all hir Responsabilitéiten huelen fir zu engem Accord ze kommen,

Lëtzebuerg wäert d'Présidence encouragéieren, hir Verantwortung ze huelen an hiren Deel bäizedroen d'Erweiterung, déi och si zu Recht fervent gefuerdert huet, ze finanzéieren.

D'Kredibilitéit vun der EU ass um Spill.

Dir Dammen an Dir Hären,

Den 29ten Oktober 2004 gouf zu Roum den neien Verfassungsvertrag ënnerschriwwen.

De Koalitiounsprogramm vun 2004 huet de Prinzip fir dëse Vertrag duerch e Volleksentscheid ze adoptéieren festgehal.

Et war net deen einfachste Wee, dat wosste mir virewech all, mä et war - an ass - politesch deen eenzeg richtegen. Den Débat war äussert lieweg an huet bewisen datt d'Lëtzebuenger Interessi un Europa hun, dat si sech betraff fille vum europäesche Geschéien.

Den 10ten Juli hunn d'Lëtzebuenger sech majoritär fir d'Konstitutioun ausgeschwat. 56,52% hu "Jo" gesot zum Verfassungsvertrag an zu Lëtzebuerg an Europa. Si hu „Jo“ gesot an engem Moment an

deem Europa sech a kengem gudden Zoustand befonnt huet, wou zwee vun de Grënnungsmembere vun der Unioun, Frankréich an Holland, sech a Referenden negativ iwwer d'Konstitioun ausgeschwat haten.

Firwat war dee Vote fir Lëtzebuerg esou wichteg?

En huet eis Stellung als iwwerzeegten, als engagéiert Europäer bekräftegt. Mir hunn eise Wonsch vun engem Zesummewuesse vun den europäesche Länner an enger politescher Unioun, mat engem staarke Sockel vu gemeinsame Wäerter, enger sozialer Maartwirtschaft, déi am Service ass vun de Mënschen, doduerch kloer zum Ausdrock bruecht. Mir hunn eis duerch eise Vote awer och ausgeschwat fir en Europa wat no zesummen ofgestëmmt Regele funktionnéiert. Fir e klengt Land wéi Lëtzebuerg ass et vu gréisster Wichtigkeet, datt Europa no Regele funktionnéiert, déi mir matbestëmmt hunn. Als Ersatz zum Verfassungsvertrag kommen elo erem déi aalbekannten Téin nees op vun engem Direktoire an Europa, enger Féierung vun engem klengen Krees vu groussen Länner. Dat ass en Entwécklungsmodell, dee mir net an Europa wëllen, dofir ass de Verfassungsvertrag fir ons och eng Garantie fir de Stëllwert vu klengen Länner an Europa.

Während der Kampagne ass vill vun engem Plan B geschwat ginn, vun der Méiglechkeet, datt d'Ofleene vum Traité eng Dynamik fir en neien Text géif matsechbréngen. D'Propositioun, fir verschidden Dispositiounen an Domänen aus dem Verfassungstext erauszehuelen, gouf opbruecht.

Dës an aner Iddien zirkuléieren och haut nach. Ech muss festhalen datt elo, bal 6 Méint méi spët, nach keng kloer, eenheetlech Strategie sech ofzeechend, wéi de Projet Europa, wéi de Verfassungsvertrag nees op de Wee bréngen.

Den leschte Juni, ënner lëtzebuurger Présidence, gouf d'Entscheidung getraff, eng Denkphase anzuleeden, wou et dorëms geet, datt all Land eng national Debatt iwwer Europa soll féieren. Déi meeschte Länner, déi de Vertrag schons ratifizéiert hunn, sinn éischter der Meenung, datt dës Iwwerleeungszeit besonnesch vun deene Länner gebraucht misst ginn, déi sech nach net zum Verfassungsvertrag geäussert hunn.

Dës Meenung ass eis Regierung awer net: nom Referendum hunn all Parteien gesot, datt et wichteg ass, den Dialog hei zu Lëtzebuerg weider ze féieren.

Den Delegéierten Ausseminister Nicolas Schmit ass en charge fir konkret Initiativen an deem Sënn auszeschaffen, an dat an éischter Stëll zesummen mat dësem héigen Haus.

Mir brauche keng nei Kampagne fir Europa, mä Aktiounen, esouwuel national wei europäesch gesinn, fir Europa an dat Liicht ze stellen wou et higeéiert.

Wat kënnt dozou bäidroen ?

1. Kuerzfristeg gesinn - ech hunn et grad gesot - wäer en Accord bei de Finanzperspektive vu grousser Bedeitung,
2. Et muss méiglech sinn och ouni Verfassung d'national Parlamenter méi staark an den Decisiounsprozess vun der EU anzubannen. De Premier huet a senger Ried, d'lescht Woch zu Berlin, eng Piste ugedeit déi een ëmsetze kéint wann d'Parlamenter vun de Memberstaaten, d'Kommissioun an de Conseil d'Accord wäeren : am Fall wou 1/3 vun de nationale Parlamenter eng Direktiv an der Substanz net matdroe kënten, misst d'Kommissioun sech nees nei mat dëser Initiativ beschäftegen. Domat kéint an der Entwécklungsphase vun Decisiounen den Impakt vun den nationalen Interessi verstärkt ginn. Dëst ass ee Beispill, anerer sinn ze fannen, fir, ouni de Verfassungsvertrag opzebriechen d'EU méi biergerne ze gestalten.
3. Kruzial awer ass d'Bereitschaft, de Wëllen an de Courage ze weisen fir dat institutionnell strukturéiert Europa dat mir brauchen, aktiv ze verdeeden. Mir brauchen et fir eis Roll an der Welt ze spillen, fir déi sozial wéi déi kulturell Kohäsioun an allen EU-Länner

weiderzebréngen, fir um Plang vun der Ëmweltpolitik, wéi och der Sécherheetspolitik Mëttelen zur Verfügung ze hunn déi wierksam sinn. An anere Wieder, mir wëllen zu Lëtzebuerg dat politesch Europa offensivverdeedegen. Ganz positiv ass an deem Kontext d'Positioun vun der neier däitscher Regierung fir de Verfassungsvertrag net rouen ze loossen, mä, falls et néideg wär, Ufank 2007, ënnert hirer Présidence, d'Diskussiounen ze relancéieren.

Här Präsident,

Mir wëssen all datt fir Lëtzebuerg den Handel eppes immens wichtiges as, ouni deen eist Land sech ni esou gutt entwéckelt hätt. Eis wichtigst Handelspartnere sinn natierlech eis Nopeschlänner an déi knapp 58% vun eisen Exporter ginn, respektiv déi aner Membere vun der EU, déi ganzer 87% vun eisen Exporter absorbéieren, mä och d'Bedeutung vum Handel mat Drëttlänner ass net ze ënnerschätzen.

D'Regierung huet, bei hirer Formatioun d'lescht Joer, décidéiert d'Responsabilitéit fir d'Handelsdossieren op zwee Ministèreen ze verdeelen, an zwar den Economieministère wat déi bilateral Promotioun vun eiser Economie ugeet, and den Ausseministère fir déi international ekonomesch Bezéiungen a besonnesch de multilaterale Volet.

De multilaterale Kader an deem de Welthandel geregelt gëtt ass d'Welthandelsorganisatioun, d'OMC, mat hiren 148 Memberen, déi am Dezember zu Hong Kong hir nächst „Conférence ministérielle“ am Kader vum Doha Entwécklungsround organiséiert, deen 2001 lancéiert gouf.

Wou si mir drun am Doha Round?

Am Oktober dëst Joer huet d'Europäesch Unioun, duerch hiren Négociateur, d'Kommissioun, eng nei Offer bei der OMC präsentéiert an där mir ënnert anerem virschloen, eis Douanestaxen op der Landwirtschaft erfzesetze, wann aner grouss Länner bereet sinn, eis hir Mäert vun de Wueren an Déngschtleschtunge méi

grouss opzemaachen. Mir schwetzen hei net vun aarmen Entwécklungsänner, mä vun aneren Industriestaaten oder „pays émergents“.

Dës nei Offer stellt, an dat ass wichtig, déi lescht Reform vun der PAC net a Fro. D'EU huet hir Landwirtschaft 2003 grondleeënd reforméiert, wat net einfach war. Mir hätten elo gär dass aner grouss Produzenten, an un éischer Plaz d'USA, och hire landwirtschaftleche Sektor nohalteg reforméieren. Leider hunn dës aner Länner eis Offer zréckgewisen, a froen nach méi Accès op eise Landwirtschaftmaart, ouni eis eppes an d'Plaz ze ginn. Déi Approach ass net akzeptabel, der Union hirt erklärten Zil ass et, fir en equilibréiert Resultat vum Doha Round ze errechen. Dat heescht en Equiliber tëschent deene verschiddene Verhandlungsberäicher - Landwirtschaft, Wueren, Servicer, Regeln an Enwécklung -, an och en Equiliber am Landwirtschaftsberäich tëschent Exportsubventiounen, interne Bähëllefes a Maatzougank.

Wéinst deene groussen Divergenze wäert et zu Hong Kong héchstwahrscheinlech net zu engem konkrete Resultat mat Zuele kommen, mä éischer wäert et eng nei Tëschenetapp vum Doha Round ginn. Dat heescht awer net, datt d'Unioun vun hiren Ambitioune fir de Round ofréckelt, d'Zil vun der EU ass nach ëmmer, fir den Doha Round géint dem Enn vum nächste Joer ofzeschléissen. Fir eis ginn et net vill valabel Alternativen zum Doha Round. Wann de Round zu näischt géif féieren, géifen d'Länner wahrscheinlech eng Hellewull vu bilateralen Ofkommen ofschléissen, an héchstwahrscheinlech géifen dann d'Interessi vun deenen äermsten a klengste Länner op der Streck bleiwen, well esou Diskussiounen natierlech kaum no der Regel vum Konsens vun der OMC géife geféiert ginn.

Wéi den Numm „Doha Development Agenda“ et seet, sollen d'Enwécklungsänner am meeschte vun dësem Round profitéieren. Dofir huet Lëtzebuerg sech ëmmer agesat. Den Doha Round kéint dozou bäidroen, dass Milliounen vu Leit aus der Aarmutt erauskommen an esou de Millenniumsziler méi no

kommen. Wann Afrika säin Undeel um Welthandel kéint em 1 Prozent an d'Luucht setzen, géif dat ongeféier e Plus vu 70 Milliarden Dollar fir dëse Kontinent bedeiten.

Dofir hoffen ech, datt zu Hong Kong e Paquet mat konkrete Measure fir d'Entwécklungslänner beschloss gëtt. D'Kommissioun an all d'EU Memberstaate schaffen am Moment haart dodrun. Esou e Paquet misst ënnert anerem virgesinn, datt all d'Industrielänner hir Mäert fir d'Exporter aus deenen äermsten Entwécklungslänner, de sougenannte PMA – „pays les moins avancés“ - opmaachen, esou wéi d'EU dat scho méi laang mat der Initiative „Everything but Arms“ gemaach huet. Ausserdeem misst esou e Paquet eng Verstärkung vun der technescher Ënnerstëtzung fir d'Entwécklungslänner virgesinn, eng séier Léisung fir déi gravéierend Problemer vun de Westafrikanesche Kotténgsproduzenten, eng definitiv Léisung fir den Accès ze erliichteren un d'Generiken fir géint den AIDS ze kämpfen.

Ech wëll an dësem Kontext och soen, datt ech mech freeën iwwert déi gutt Zesummenaarbecht déi mir mat der Chamber op dësem wichtege Dossier bis ewell haten: ech gesinn et dofir och als besonnesch positiv un datt zwee vun Äre Membere mat op Hong Kong ginn.

Wéi schons gesot ass d'Verdeedegung vun eise Wirtschaftsinteressi eng „Joint venture“ ginn. Am bilaterale Beräich bréngen de Wirtschaftsministère grad esou wéi den Ausseministère hir spezifesch „valeur ajoutée“ zesumme fir der lëtzebuenger Economie déi bescht méiglech Ënnerstëtzung ze ginn.

Dës Ënnerstëtzung ass e wichtege Deel vun eiser Diplomatie. Duerch säin diplomateschen a konsularesche Réseau huet den Ausseministère e wichtegt Instrument fir eisen Entrepreneuren ze assistéieren. Zesumme mat dem Wirtschaftsministère maachen eis Ambassaden, eis Konsulater an eis Bureauen d'Promotioun vum Standuert Lëtzebuerg. Si hëllef eisen Entrepreneuren och, nei Kontakter ze knäppen a stinn hinne mat Rot an Dot zur Säit.

Wirtschaftsmissiounen déi gemeinsam organiséiert ginn bleiwen och e wichtegt Instrument am Déngscht vun eiser Economie. Dat huet een zum Beispill gutt bei der rezenter Missioun an den arabeschen Emirater an a Jordanien gesinn un d'äer sech méi wéi 60 Firmen bedeelegt hunn. Och am Kader vu Staatsvisite ginn Wirtschaftsdelegatiounen ëmmer méi agebonnen. Dat war lo eréischt kierzlech de Fall an der Slowakei an a Bulgarien. Eis Betriber profitéieren op esou Visite vum offiziellen Encadrement deenen hinnen hir Kontakter erliichtert.

D'lëtzebuenger Wirtschaft interesséiert sech natierlech och fir d'grouss Mäert vun den „économies émergentes“. Och do musse mir dofir suergen dat mir präsent sinn, well et ass wichteg datt eisen Aussenhandel sech méi diversifizéiert vir vun der héijer Croissance an deene Länner ze profitéieren an doduerch och manner verletzlech fir eventuell Krise bei eisen traditionelle Partner ze ginn. Dofir gëtt d'nächst Joer eis Representatioun a China duerch en neit Generalkonsulat zu Shanghai ausgebaut, dat virun allem eise klengen a mëttlere Betriber soll hëllef, a China Fouss ze faassen.

De Réseau vun eisen Ambassaden an der Welt erlaabt et, eis Interessi ze verdeedegen. D'Ambassade sinn Instrumenter vun eiser Aussepolitik, um bilaterale wéi um multilateralen Plang.

D'bilateral Ambassaden an den EU Memberstate si méi ewéi je indispensabel. D'Ministère gesinn hir Kollegen zwar regelméisseg op Conseilen an anere Reuniounen, mä dat heescht net, datt et nach ëmmer méiglech ass, zu 25 oder 27 enk Kontakter mat jidferengem ze halen.

Or, eng national Positioun erklärt sech ëmmer duerch national Gegebenheeten. Et ass dofir wichteg ze verstoen, wat an engem Land politesch a wirtschaftlech lass ass, wat seng Prioritéite sinn. Déi Informatiounen, déi mir vun eisen Ambassade kréien, ginn eis e bessert Verständnis vun de Realitéiten an deene Länner a vun de politesche Konditiounen déi eng Décisioun beaflossen.

Et ass méi einfach mat eisen Nopeschlänner, mat deene mir schon esou laang zesummeschaffen, wéi mat deenen, déi geographesch wäit ewech sinn an déi elo eréischt viru kuerzem der Europäescher Union bäigetruede sinn. Mä och d'Relatiounen mat eisen traditionelle Frënn musse gepflegt ginn.

D'Zesummenaarbecht mat eise belsche Frënn an Noperen huet sech dës lescht Joren erëm dynamiséiert. Nom Sommet am Juli zu Lëtzebuerg gesinn déi zwou Regierungen sech erëm muer (den 30. November) zu Bréissel, fir iwwert gemeinsam Projeten ze schwetzen. D'UEBL ass fir Lëtzebuerg méi ewéi just de Kader ginn fir eis bilateral Wirtschaftsrelatiounen oder den Handel mat Drëttlänner. Eng ganz Rei vun neie Felder hun sech opgemaach déi eis et erlaben, um europäesche Plang mei enk zesummen ze schaffen.

De Benelux gëtt nach ëmmer als e Laboratoire fir d'europäesch Integratioun ugesinn. 2006 wäert d'Lëtzebuerg erëm am éischte Semester d'Présidence iwwerhuelen, an engem Moment wou déi dräi Regierungen sech zesumme Gedanke musse maache wéi et mat der Kooperatioun no 2010, wann de jëtzege Vertrag ofleeft, weidergeet. Mir gesinn nach ëmmer fir de Benelux eng Daseinsberechtigung. Ze dräi kënnen mir dacks méi wäit goen. An engem vergréisserten Europa hu mir all Interêt, den enken Krees vum Benelux ze präservéieren. Dëst och wa mir alt ponktuell verschidden Approchen entwéckelen.

Mir mir mussen awer och kucken, wou mir nei Frëndschaften opbaue kënnen. An engem Europa mat iwwer 25 Memberstaaten ass et méi wéi jee wichteg, Allianzen ze sichen.

Nei Allianze mat Länner, déi vläicht net eis direkt Nopere sinn, mä déi awer op der selwechter Linn si wéi mir op spezifischen Dossieren. Wéi scho gesot huet eis lescht Présidence eis eng grouss Kredibilitéit ginn, an als Membre Fondateur vun der Unioun gëtt eis och eng gewëssen Experienz unerkannt. Mir mussen dat notze fir eis Positioun an engem vergréisserten Europa ze verstärken.

Mir kënnen leider net an alle 25 Memberstaaten duerch eng Ambassade repräsentéiert sinn. Dofir huet Lëtzebuerg "regional" Ambassaden, mat multiplen Akkreditatiounen déi et erlaben, bal all eis Partner ofzedecken. De leschte Posten, dee mir opgemaach hun, ass zu Warschau, a Polen, deem gréisste vun den neie Memberstaaten. Et ass grad wichteg datt mir elo an Zentraleuropa präsent sinn fir nei politisch an kommerziel Relatiounen opzebauen. Mir hoffen datt et an der Zukunft och nach méiglech ass, weider Posten an där Regioun opzemaachen.

Här Präsident,

Dir Dammen an Dir Hären,

Laut dem Koalitiounsvertrag vun dëser Regierung dréit den Ausseminister d'Verantwortung fir de gudden Empfank vun europäeschen Beamten a fir d'Gebailechkeeten vun den EU-Institutiounen an hire Servicer déi hei zu Lëtzebuerg hire Sëtz hunn. Dëst ass eng grouss Erausforderung, där mir musse gewuess sinn, well d'Virdeeler fir de Standuert Lëtzebuerg grouss sin. Dës Virdeeler sinn net nëmme wirtschaftlecher Natur. Et geet hei em näischt manner wéi em den internationale Prestige an d'Visibilitéit vun onsem Land.

Dofir bleiwt eng nohalteg Sëtzpolitik, déi och de kommende Erweiterung vum der EU Rechnung dréit, e ganz wichteg Element vun eiser Aussepolitik.

D'Erweiterung vum der EU bidd net nëmme nei Chancen, mä bréngt och eng Erweiterung vun onse Pflichten mat sech. Mir hu Pflichten géigeniwwer der Unioun, de Memberstaten an deene Leit, déi hei bei eis liewen a schaffen. Mir huelen dës Aufgaben eescht. De Kirchbiereg, d'Symbol vun der europäescher Präsenz hei, bleiwt an engem groussen Ëmbau.

Eng ganz Rei vu Projeten sinn nach amgang, réaliséiert ze ginn, fir datt déi 9.600 aktuell esou wéi all déi zukünfteg europäesch Fonktionäre mat hire Familjen esou gutt ewéi méiglech hei integréiert ginn, an agreabel Aarbechts-, Schoul- an Wunnkonditiounen gebuede kréien.

Den interministerielle Koordinatiounskomitee fir de Sëtz vun den EU-Institutiounen, deen ënnert menger Verantwortung ass an dee vum Generalsekretär vum Ausseministère geleet gëtt, huet sech och am leschte Joer mat vill Zäit an Energie dofir agesat, datt mir eng proaktiv an accueillant

Sätzpolitik garantéieren. D'Virbereedung, d'Koordinatioun an de Suivi vu ganz wichtege Immobilien-Projeten sin an deem Kader geléist ginn, a vill Erausfuerderunge stellen sech nach an noher Zukunft. Ech muss do e grouse Merci soen un all déi Administratiounen, déi eis hëllef, eise Obligatiounen nozekommen.

Ech denken do zum Beispill un eis Pflicht fir dem europäesche Ministerrot esou séier ewéi méiglech ee moderne Konferenz-Zentrum fir seng Aarbechtssätzungen ze bidden, un d'Vergréisserung vun deem prestigiéisen europäesche Geriichtshaff, un déi zweet Europaschoul, un d'Extensioone vum Rechnungshaff a vun der Europäescher Investitiounsbank oder un den neie Sätz vum Generalsekretariat vum Europaparlament.

Virun e puer Deeg huet de Regierungsrot de Prinzip vun enger neier Aart vun Zesummenarbecht mam Europaparlament ugeholl, an net méi spéit ewéi muer wäert de Bureau vum Europaparlament dat och maachen. Mat dësem Accord hoffe mir, datt all d'Servicer vum Europaparlament bis 2010 an engem eenzege Gebai ënnerbruecht sinn.

E Regruppement vun alle lëtzebuurger Servicer vun der Kommissioun hei zu Lëtzebuerg an engem Ersatz-Gebai fir de Jean Monnet – deem seng Alterserscheinungen net ze verkenne sinn – ass e weidert Zil vun deem Koordinatiounskomitee.

De Centre de Traduction, deem seng Servicer duerch déi vill nei Sproochen an der EU aus allen Néit plazen, ass op der Sich no engem definitive Sätz hei zu Lëtzebuerg. Den Neien Hémicycle geet net méi duer.

Den 1. Oktober ass eng nei europäesch Geriichtsintanz hei zu Lëtzebuerg ageriicht ginn: déi vun der europäescher Fonction publique.

Iwwert déi grouss Bauprojeten fir d'EU-Institutiounen eraus bleiwen ech a meng enkste Mataarbechter a permanentem Kontakt mat de Servicer vun der Kommissioun an dem Europaparlament, mat den europäesche Gewerkschaften an de Verwaltungsscheffe vun den Institutiounen, fir op Basis vun den historesch-relevanten Decisiounen an der Sätzfro déi quantitativ a qualitativ Präsenz vun den EU-Organer hei zu Lëtzebuerg ze stäerken.

Mir hun also eng ganz Rei Projeten fir d'Europäesch Institutiounen zu Lëtzebuerg. D'Erausfuerderunge si grouss a mir huelen se eescht. De Minister vun den öffentleche Bauten an ech selwer wëllen an Zukunft nach méi intensiv mat de relevante Kommissiounen vun der Chamber kooperéieren, fir d'Promotioun vum lëtzebuurger Siège ze maachen.

Här Präsident,

Dir Dammen an Dir Hären,

D'Présidence gouf eis d'Geleeënheet fir weider un der europäescher Eenegungsgeschicht matzeschreiwen: eng Erausfuerderung déi mir am Sënn vun der europäescher Konstruktioun, mä och am Sënn vu Lëtzebuerg, opgegraff hunn.

D'Présidence gouf eis awer och d'Geleeënheet fir am Sënn vum UNO Generalsekretär Kofi Annan senger Maxime „...il n'y a pas de sécurité sans développement, il n'y a pas de développement sans sécurité et il ne peut y avoir ni sécurité, ni développement si les droits de l'homme ne sont pas respectés...“ ze handelen. Et ass dat eng Maxime déi d'lëtzebuurger Aussepolitik wäit iwwert dës Présidence eraus wäert guidéieren.

Ech soen Iech Merci.